

## ■ TRIBUNA POLITICA

# Vatgas cun cornas – gea!

DA SILVA SEMADENI,  
CUSSEGLIERA NAZIUNALA

**I**ns discurra pauc da l'iniziativa «Vatgas cun cornas». La discussiun en connex cun las votaziuns dals 25 da november sa concentrescha surtut sin l'iniziativa engianaivla da la pps davart l'autodeterminaziun. Cun questa votaziun vul la pps far strada per sias iniciativas cunter ils esters, per sias propostas da midar la Constituziun federala cuntrarias als dretgs umans ed al dretg internaziunal. La pps periclitgescha uschia la stabilitad e la segirezza giuridica dal stadi da dretg ed indeblescha la piazza economica e la protecziun dals dretgs umans. Segiramain na garantgescha ella betg dapli autodeterminaziun. La Svizra è gia oz il pajais nua che la democrazia directa vegn ad esser vivida il pli intensivamain. I na fa betg star stut che la debatta è talmain buglienta.

**L**'iniziativa populara «Vatgas cun cornas» resta percenter marginala en las discussiuns politicas. Ella zuppenta dentant in istorgia plain emozziuns, mussa in lung cumbat cunter il current, ina passiuon contagiusa per la defensiuon da la dignitad da noss animals da chasa. Ils promoturs, en emprima lingua in



pur dal Giura cun ragischs sursilvanas, *Armin Capaul*, e sia pitschna cuminanza d'interess «Hornkuh», han rimnà pli che 150 000 sutscritpziuns per las vatgas cun cornas. L'iniziativa dumonda sulettamain in sustegn finanziel per quels e quellas che tegnan vatgas e chauras cun cornas. Ella na scumonda betg da scornar ils animals e na vul er betg augmentar il preventiv agricul.

**A**vant che lantschar l'iniziativa populara han empruvà ils promoturs tut las pussaivladads per cuntanscher lur finamira: intervenziuns persunalas a Berna, ina petiziun cun 18 000 sutscritpziuns, propostas durant las tractativas da la politica agrara 2014–2017. Senza success, la politica federala nun ha vulì chattar nagina resposta a lur pretensiun moderada. La votaziun populara repre-

schenta pia la davosa schanza per las vatgas e chauras cun cornas. E perquai sustegn era jau l'iniziativa.

**A**las fieras da muvel ves'ins nossas vatgas da latg cun las nattas da las cornas brischadas e lur cumparsa trista d'in animal mutilà. Las cornas èn ina part integranta da l'animal nua ch'il sang cula tras, ellas èn chaudas. Las cornas servan a stabilir l'ierarchia sociala tranter las vatgas, a la comunicaziun, a la tgiira dal corp. Ina giada eran las cornas da la vatga la luschezza dal pur! E sin l'emballadi dal latg ed en la reclama turistica ins na vesa betg ina vatga senza cornas.

**L**as vatgas vegnan scornadas per motivs economics, pertge cun cornas ins dovra dapli piazza en stalla. Sche l'iniziativa vegn acceptada dal pievel, lura chatta il parlament ina pussaivladad per indemnizar ils purs che tegnan vatgas cun cornas senza ch'il preventiv agricul vegnia augmentà. En mintga furma da stalla, er en las stallas libras, èsi pussaivel da tegnair vatgas cun cornas e respectar las reglas da la protecziun dals animals. I vala la paina da sustegnair quest pitschen pass per salvar la dignitad da noss pli chars animals domestics.